

Banjir 2024: PM zahir penghargaan kepada 80,000 polis, penjawat awam bantu mangsa
Astro Awani
03 Disember 2024
Luqman Hariz

KUALA LUMPUR: Perdana Menteri, Datuk Seri Anwar Ibrahim menzahirkan penghargaan kepada 80,000 penjawat awam yang menggembeleng tenaga untuk membantu mangsa banjir, khususnya pasukan polis di seluruh negara.

Menurut beliau, semangat dan kecekalan anggota polis harus dikagumi, di mana kebanyakan mereka tidak pernah mengeluh walau membanting tulang siang dan malam untuk membantu mereka yang terjejas.

Ini membuktikan bahawa peranan polis jauh melangkaui sekadar mencegah jenayah, tegas beliau.

"Saya sebagai manusia biasa, terkesan. Kita lihat mereka ini tidak cukup tidur, tapi kalau tanya, tak pernah kata letih atau sukar.

"Mereka terima dengan baik dan jumlah penjawat awam yang terlibat ini 80,000 orang yang berkhidmat untuk membantu.

"Pasukan polis antara yang terutama kerana mereka di akar umbi, di tiap daerah, tiap kawasan, tiap lereng," kata beliau.

Beliau turut menghargai peranan penjawat awam yang menjayakan Skuad Ihsan Madani, yang turut membantu mangsa selepas bencana melanda termasuk untuk pembersihan kediaman dan membaiki kerosakan.

Bencana banjir yang bermula akibat luruan Monsun Timur Laut pada hujung November lalu menyaksikan puluhan ribu mangsa terjejas, khususnya di Pantai Timur.

Setakat jam 2.30 petang Selasa, 79,831 mangsa masih ditempatkan di 301 pusat pemindahan sementara (PPS) di Kelantan, Terengganu, Perak, Pahang, Kedah, Johor dan Melaka.

© 2024 Astro AWANI Network Sdn. Bhd. 200001032668(535275-D) All Rights Reserved.

Source: <https://www.astroawani.com/berita-malaysia/banjir-2024-pm-zahir-penghargaan-kepada-80000-polis-penjawat-awam-bantu-mangsa-499083>